

Na osnovu člana 13. stav 1. tačka b. i člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04), člana 37. stav 2. Zakona o zdravstvenoj zaštiti ("Službene novine Federacije BiH" broj 29/97), čl. 37. i 38. Zakona o zdravstvenom osiguranju ("Službene novine Federacije BiH", broj 30/97 i 7/02), a u vezi sa Rješenjem Konkurencijskog vijeća broj 01-01-26-001-69-II/07 ("Službeni glasnik BiH", broj 68/07) i Presude Suda Bosne i Hercegovine broj U-1108/07 od 6. veljače/februara 2008. godine, Skupština Kantona Sarajevo, na sjednici održanoj 25. juna 2008. godine, donijela je

ODLUKU

O MREŽI APOTEKA U KANTONU SARAJEVO, KAO I KRITERIJIMA, NAČINU I USLOVIMA UGOVARANJA APOTEKA

Član 1.

(Predmet Odluke)

Ovom Odlukom utvrđuje se ugovaranje sa Mrežom apoteka u Kantonu Sarajevo za izdavanje lijekova na recept, djelokrug rada ugovornih apoteka, organizacioni oblici apoteka, izdavanje lijekova na teret sredstava Zavoda zdravstvenog osiguranja Kantona Sarajevo (u daljnjem tekstu: Zavod), nadzor nad radom ugovornih apoteka, te druga pitanja od značaja za obavljanje apotekarske djelatnosti kao dijelatnosti od interesa za Kanton Sarajevo.

Član 2.

(Djelokrug rada apoteke)

- (1) Apoteka osigurava nabavku i izradu lijekova i snabdijevanje medicinskim proizvodima građana određenog područja, zdravstvenih ustanova i drugih pravnih osoba, te zdravstvenih radnika koji obavljaju privatnu praksu.
- (2) Pod snabdijevanjem lijekovima podrazumijeva se promet lijekova na malo koji se obavlja u apotekama, ograncima, odnosno depoima apoteka, a obuhvata naručivanje, čuvanje i izdavanje lijekova na recept i bez recepta, kao i izradu i izdavanje magistralnih i galenskih pripravaka provjerenog kvaliteta.
- (3) Pod snabdijevanjem medicinskim proizvodima podrazumijeva se promet medicinskih proizvoda na malo, a obuhvata naručivanje, čuvanje i izdavanje medicinskih proizvoda.
- (4) Osim snabdijevanja lijekovima i medicinskim proizvodima, apoteka vrši snabdijevanje i prometovanje na malo:
 - a) homeopatskim proizvodima,
 - b) dječjom hranom, dijetetskim i herbalnim proizvodima,

- c) kozmetičkim i drugim sredstvima za zaštitu zdravlja

Član 3.

(Organizacioni oblici apotekarske djelatnosti)

- (1) Apotekarska djelatnost obavlja se kroz sljedeće organizacione oblike:
 - a) zdravstvena ustanova-apoteka u okviru koje se mogu organizovati ogranci, odnosno depoi apoteke,
 - b) apoteke privatne prakse,
- (2) Organizacioni oblici apotekarske djelatnosti (u daljnjem tekstu: Apoteke) pod tačkom a) i b) stava (1) ovog člana u svom sastavu moraju imati laboratorij za izradu galenskih i magistralnih pripravaka, u okviru kojeg se vrši provjera kvalitete galenskih pripravaka i identifikacija ljekovitih tvari, a prema postupcima izrade propisanim važećim farmakopejama ili magistralnim propisima,

Član 4.

(Uslovi za obavljanje apotekarske djelatnosti)

- (1) Opći uslovi za obavljanje apotekarske djelatnosti su:
 - a) odobrenje za rad apoteke,
 - b) upis u registar Ministarstva zdravstva, odnosno registar nadležnog suda,
 - c) licenca nadležne komore za magistra farmacije

Član 5.

(Zaposlenici u apoteci)

- (1) Zaposlenici u apoteci su zdravstveni radnici koji imaju obrazovanje farmaceutskog usmjerenja i neposredno pružaju apotekarske usluge, i to:
 - a) magistri farmacije s odobrenjem za samostalan rad,
 - b) magistri farmacije specijalisti odgovarajuće grane farmacije.
- (2) U obavljanju apotekarske djelatnosti sudjeluju farmaceutske tehničari s položenim stručnim ispitom.
- (3) Farmaceutski tehničar može raditi u apoteci samo uz prisustvo magistra farmacije, u skladu s opsegom rada za farmaceutske tehničare.

Član 6.
(Aktivnosti magistara farmacije)

- (1) Magistar farmacije je jedina ovlaštena osoba za izdavanje lijekova na recept.
- (2) U cilju postizanja boljih farmakoterapijskih učinaka i promoviranja racionalne upotrebe lijekova i medicinskih proizvoda, u apotekama, magistri farmacije aktivno sudjeluju u spriječavanju bolesti i zaštiti zdravlja, u saradnji s drugim zdravstvenim radnicima i provode sljedeće aktivnosti:
 - a) savjetovanje u vezi pravilne primjene lijekova, medicinskih, homeopatskih, dijetetskih i herbalnih proizvoda,
 - b) praćenje pridržavanja terapijskih protokola od strane pacijenata,
 - c) provođenje preventivnih mjera očuvanja i zaštite zdravlja,
 - d) racionalizaciju troškova za određene terapijske protokole,
 - e) praćenje, izbjegavanje ili smanjivanje nuspojava lijekova,
 - f) izbjegavanje interakcija, terapijskog dupliciranja ili pojave alergija,
 - g) unapređivanje farmakoterapijskih postupaka i postizanje terapijskih ciljeva.

Član 7.
(Odgovorna osoba)

Apoteka, ogranak, odnosno depo apoteke ili laboratorija mora imati odgovornu osobu koja je odgovorna za zakonit i stručan rad, koja može voditi samo jednu apoteku, ogranak, odnosno depo apoteke ili laboratorij.

Član 8.
(Poštivanje pravila struke)

U obavljanju apotekarske djelatnosti magistri farmacije dužni su poštivati Kodeks farmaceutske etike i deontologije i Pravila dobre apotekarske prakse.

Član 9.
(Obaveza čuvanja profesionalne tajne)

Sve što magistar farmacije pri obavljanju apotekarske djelatnosti sazna o korisniku, a u vezi s njegovim zdravstvenim stanjem, mora čuvati kao profesionalnu tajnu i može je otkriti, ako posebnim zakonom nije drukčije propisano, samo uz odobrenje korisnika, roditelja ili staratelja za maloljetne osobe, a u slučaju njegove psihičke nesposobnosti ili smrti, uz odobrenje uže porodice, staratelja ili zakonskoga zastupnika.

Član 10.

(Izdavanje lijekova na teret sredstava Zavoda)

1) Izdavanje lijekova na recept, odnosno na teret sredstava Zavoda, osiguranicima Kantona Sarajevo će se vršiti u svim apotekama koje imaju rješenje Ministarstva zdravstva Kantona Sarajevo za obavljanje farmaceutske djelatnosti, koje zaključuje ugovor sa Zavodom.

Član 11.

(Ugovorni odnos)

- (1) Ugovaranje će se vršiti po jedinici farmaceutske usluge.
- (2) Ugovorom sa Zavodom će se definisati vrsta, obim i kvalitet farmaceutskih usluga koje farmaceutski tim u apoteci pruža osiguranim licima Zavoda, način obračuna i plaćanja usluga, te visinu naknade za pružene usluge.

Član 12.

(Radno vrijeme ugovornih apoteka)

Ugovorne apoteke moraju imati obezbijedenu jasno vidljivu oznaku radnog vremena saglasno rješenju Ministarstva zdravstva kojim je odobreno obavljanje farmaceutske djelatnosti.

Član 13.

(Dežurne apoteke)

Za naseljena mjesta preko 20.000 stanovnika, Ministarstvo zdravstva Kantona Sarajevo će odrediti apoteke koje će osigurati stanovništvu Kantona Sarajevo neprekidno snabdijevanje lijekovima u trajanju od 24 h sagladavajući uslove obezbjeđenih timova neophodnih za organizaciju noćnog rada.

Član 14.

(Ograničenja za izdavanje lijekova)

- (1) Magistar farmacije ne smije bez recepta ili medicinske dokumentacije izdati lijek koji ima odobrenje za stavljanje u promet na recept.
- (2) Magistar farmacije ne smije staviti lijek u promet izvan prostora apoteke, niti oglašavati lijekove putem interneta i ostalih medija, izuzev lijekova koji imaju odobrenje nadležnog organa.
- (3) Farmaceutski tehničar ne smije izdavati lijekove na recept, lijekove koji sadrže opojne droge niti izrađivati magistralne pripravke koji sadrže tvari jakog ili vrlo jakog djelovanja.

Član 15.
(Izdavanje lijekova u dežurstvu)

Količina propisanog lijeka u dežurstvu, sa oznakom hitnosti, ne može biti veća od količine potrebne za terapiju u trajanju od 24 sata, što je magistar farmacije prilikom izdavanja dužan poštivati.

Član 16.
(Uskraćivanje izdavanja lijeka ili medicinskog proizvoda)

Tokom rada magistar farmacije uskratit će izdavanje lijeka ili medicinskoga proizvoda:

- a) za koje stručno procijeni da bi mogli ugroziti zdravlje korisnika,
- b) u slučaju neispravne i zastarjele medicinske dokumentacije.

Član 17.
(Dokumentacija u apoteci)

(1) Apoteke su obavezne, pored evidencije izdatih lijekova na recept, odnosno na teret sredstava obaveznog zdravstvenog osiguranja, voditi:

- a) evidenciju privatnih recepata,
- b) laboratorijski dnevnik,
- c) knjigu evidencije izdatih opojnih droga,
- d) evidenciju obavljenih identifikacija ljekovitih tvari i galenskih pripravaka.

(2) Dokumentacija iz stava (1) ovog člana mora biti dostupna farmaceutskom inspektoratu i kontrolorima Zavoda.

Član 18.
(Nadzor nad radom ugovornih apoteka)

(1) Ministarstvo zdravstva Kantona Sarajevo, odnosno farmaceutski inspektor obavlja stručni nadzor nad radom apoteka, laboratorija i magistara farmacije.

(2) Ministarstvo zdravstva može od Međukantonalne farmaceutske komore (u daljem tekstu: Komora) tražiti odgovarajuće izvještaje i podatke, koje je ista dužna dostaviti u roku od 10 dana.

(3) Komora je obavezna ministru zdravstva podnijeti godišnji izvještaj o radu iz područja javnih ovlasti do 1. marta za prethodnu godinu.

(4) Kontrolori Zavoda su obavezni tokom ugovornog razdoblja provoditi kontrolu izvršavanja ugovornih obaveza apoteke.

(5) Kontrola u smislu stava (4) ovog člana se provodi u skladu sa odredbama zakona, općih akata Zavoda i Ugovora a na način da se izvrši pregled recepata, pravne i finansijske dokumentacije zbog provjere tačnosti podataka koji se dostavljaju Zavodu.

(6) Prilikom provođenja kontrole izvršavanja ugovornih obaveza apoteke, Zavod je obavezan posebno voditi računa o ostvarivanju prava osiguranih osoba Zavoda na zdravstvenu zaštitu iz obaveznog zdravstvenog osiguranja, odnosno o namjenskom korištenju sredstava dobivenih od Zavoda za tu namjenu, prema sklopljenom ugovoru.

(7) O izvršenoj kontroli sastavlja se zapisnik u 3 (tri) primjerka od kojih po jedan primjerak zadržava kontrolor Zavoda, ugovorna apoteka a jedan primjerak se dostavlja Ministarstvu zdravstva.

Član 19. (Izvještaji)

(1) Ugovorna apoteka je obavezna izvještaje o potrošnji lijekova izdatih na recept dostavljati Zavodu najmanje jednom mjesečno, a po zahtjevu Zavoda i češće, a najkasnije do 5. u mjesecu za prethodni mjesec.

(2) Obrazac mjesečnog izvještaja koji je apoteka dužna da dostavlja Zavodu je sastavni dio softvera za praćenje potrošnje lijekova.

(3) Ugovorna apoteka je dužna godišnje izvještaje o potrošnji lijekova izdatih na recept dostaviti Ministarstvu zdravstva, Zavodu kao i Zavodu za javno zdravstvo Kantona Sarajevo.

Član 20. (Raskid Ugovora)

(1) Ugovor se može raskinuti i prije isteka roka na koji je zaključen, ukoliko jedna od ugovornih strana ne ispunjava svoje ugovorene obaveze.

(2) Raskid ugovora između ugovorne apoteke i Zavoda će se izvršiti ako:

a) Komora magistru farmacije privremeno ili trajno oduzme odobrenje za samostalan rad,

b) se ispune uslovi za prestanak rada apoteke,

c) se utvrde propusti u radu sa receptima,

d) apoteka nezakonito i nestručno nabavlja, skladišti i izdaje lijekove,

- e) se ne vrši izvještavanje Zavoda, Ministarstva zdravstva i Zavoda za javno zdravstvo Kantona Sarajevo,
- f) u svom radu napravi propuste vezano za zaštitu tajnosti medicinskih i drugih informacija,
- g) u radu ne osigura jednak tretman svim korisnicima usluga,
- h) ne ispunjava uslove utvrđene ovom odlukom.

Član 21.
(Završne odredbe)

Stupanjem na snagu ove Odluke, stavlja se van snage Odluka o usvajanju Mreže farmaceutске djelatnosti-apoteka u Kantonu Sarajevo ("Službene novine Kantona Sarajevo", broj 24/01)

Član 22.
(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-05-21416/08
25. juna 2008. godine
Sarajevo

Predsjedavajući
Skupštine Kantona Sarajevo
dr. **Denis Zvizdić**, s. r.